

Mɛkana ε Pɔl, yii mɛkɛn Bot ε ghaada Tesalonik Eniel

Pɔl nakus zɛɛga ndjaa mendjaala mɛ ghaada Tesalonik ε é mɛndjon mɛ e ebá yii ɛkɛgoola Mbɛɛ Bhaadal. Bhis nyɛ nadus kɔ ghaada Filip ε nyɛ naazyɛ kɔ ghaada Tesalonik.

Ghaada Tesalonik é pak pɛ ɛko ε kyee dik Ghɛɛs, nɛ pɛ ɛdjem ε dwoo tɔ kyee dik Masedwan. Ye é ghaada mɛbom. Mbula bɛdjon nadidi é kɔ ghaada tak, dan-dan ε mbula bot ε mbyak eYuda. Tin, bɛdhiiti bot tɔ mbyak eYuda nabɛ é ààdi ekwyɛl mɛlyo ε Pɔl, wɔ gwak bɛ ɛzɛsɔ nyɛ. Pɔl nakwyal mɛkana ε étep bot ε Tesalonik, bot ε namyaal ɛdum ε kɔɲ ε na bes ɔ. Deenek, nyɛ kadjedjɛ mɛlyo mɛ ε, pɛ daa lɔɔ. Belyoel gek é náá, ye é mɛkana mɛkɛn ee Pɔl nakwyal nɛ ekeletyɛ é. Ye é di deenek ɔɔ, ye é mɔɔ pes mɛkana mɛ mɛkɛn tɔ mɛkana mɛ ɛbhɛɲ ε na bes.

Tin, Etsek ε mɛkɛn e mɛkana mak (1.3) kaada mena é, ɛgwakel Pɔl nadi nɛ yɛ nɛ bot ε ghaada Tesalonik ε. Tɔ ɛlanɛl ená kɛkum yii etɛn (4.5), Pɔl ɛpedjɛ mɛghaaz nɛ bot ε Tesalonik étep bɛ neetɔ sok tɔ tsik ekeletyɛ bɛ di nɛ yɛ ε.

Mɛkana mak ε étep ɛkoobal zyaala nadi tɔ ndjaa mendjaala mɛ na bes nyɛ nakus ε. Zyaala tak nabɛ é dum nɛ bɛmɛlyo, kɔ ɛsu ε ɛbula ε Klisto. Nyɛ ɛpebaadjɛ mɛgaaz ekeletyɛ é ɛsa mɛsa.

Mɛtsek mɛ mɛkana mak ε dáak:

1) Mɛswosel (1.1)

- 2) Dáa bot ε Tesalonik nadum konj ne Zεεb ε (1.2–3.13)
- 3) Tsik Zεεb di emyaala ne ye ε (4.1-12)
- 4) Ebwaalel tɔ ebula ε Klisto (4.13–5.11)
- 5) Melyo ne meswosel me mesik (5.12-28)

Meswosel

¹ Ye é mam Pól zenɔɔ Silas ne Timote, bis kwyal mekana mak é étep bot ε zεεga mendjaala ghaada Tesalonik, bot ε di bot ε Zεεb Σεεg'ena dɔɔ ne Yezu Klisto ɔ: beta náá, enem ne embεε ne egwyem di ne nen!

Edum ε konj ne Zεεb bot ε Tesalonik

² Bis ne bulal bhɔɔ ne Zεεb melu djas kɔ esu ε len. Eghen bis djaala é, bis ne baadjaala kɔ esu ε biyɔ djas.

³ Sok bhwoob Zεεb Σεεg'ena bis ne taala melu djas ne ghin edum ε konj ε len ne Zεεb, ne mesa me kwyel zenɔɔ ebwaalel bi di ne ye ne Ghen'enaka Yezu Klisto ε.

⁴ Bɔn nyεεg, bis ne gu náá, Zεεb ne kwyel bin, nyε nasée bin ε étep bi needi be.

⁵ Deenek, é sok bis nagoola bin Mbεε Bhaadal ε, ye nabe é ààbe mekpa ne mekpa toto. Tin, ye nabe é ne ghwyil mebwala, ne Sisim na Dεε dɔɔ ne ebwaalel djas. E sok mena nadika sama é, bi nabee mefulu me bis nadi ne ye kɔ esu ε len ε.

⁶ Tin, bi naabaɲa mefulu mes, ne yii Ghen. Ye nakoozodi mezuk men, bi naabalamyaal mekpa ε Zεεb ne memyaala Sisim na Dεε di edje ε.

⁷ E di'enek, bi moo é bot ε di náá, bot ε zedum konj ne Zεεb pε ghaada Masedwan ne bot ε ghaada Akayi aakadu mefulu mɔɔ ɔ.

⁸ Tin, ye é kɔ kyee dik'en ε məkpa ε Ghɛɲ nakan ɛgoolaa, da ye é djala kyee dik Masedwan djas nɛ kyee dik Akayi. Tin, bot djas nɛ gu ɛdum ε koɲ ε len nɛ Zɛɛb, bis tok nɛ ghwyil ɛbaalii kɔ ɛsu ε tak.

⁹ Bot djas ɛpelii dáa bi nabe bis é sok bis nadi pɛ yebɔ ε, nɛ dáa bi nakat ɛduwal ε bɛZɛɛb ε ekpaka-kpaka ɛtɛp ɛdum ε koɲ nɛ Zɛɛb. Nyɛ é tɛtɛ Zɛɛb, mot di nɛ tsik ɔ.

¹⁰ Tinaak, bi ɛpebwood náá, mɔn'ɛ mot di edus pɛ tɔ gwoo ɔ zyɛ. Mɔn'ɛ tak é Yezu, mot Zɛɛb nagomal pak bot ε zegwyɛ ɔ. Ye é mɔn'ɛ tak é kwaapek mena é ɛpɛɛ e Zɛɛb di ezyɛ ε.

2

Mɛsa ε Pɔl pɛ kyee dik Tesalonik

¹ Bɔn nyɛɛg, biyɔ bɛmet nɛ gu ɛnyɔɛpe náá, bis nabe é ààzyɛ pɛ yebɔ yii gwyɛs.

² Bi nɛ baagu náá, é ghɛɲ sok, bis naaleeaa nɛ ɛtiigaa pɛ kɔ ghaada Filip. Tin, Zɛɛb naadjɛ bis mɛghaaz mɛ ɛgoola bin Mbɛɛ Bhaadal tɔ boo tuub bis nadi eswak nɛ yɛ ε.

³ Etɛɛ náá, mɛlyo mɛ bis di elyo bin ε, ye tok esuwa-esuwa ɛtsal. Ye tok etɛɛ náá, bis naazewo ze. Tin, bis ààsaɲ ɛkɔɔ mot.

⁴ Tin, bis zolii é dáa Zɛɛb di ekwyɛl ε. Etɛɛ náá, nyɛ eebee náá, nyɛ é nɛ ɛbwaalel nɛ nes, nyɛ bookyeed bis, bis kɛgoola Mbɛɛ Bhaadal. E di'enek, bis ààsaa náá, bot ε bɔs myaala nɛ nes, bi saɲ é náá, Zɛɛb myaala nɛ nes, nyɛy mot di egu esiiza e elyem bis ɔ.

⁵ Biyɔ bɛmet nɛ gu ɛnyɔɛpe náá, bis àálii wak ɛtɛp ɛkɔp ε bot, tin, ɛkwosak ε les nabe é ààbɛ ɛtɛp bis needi tɔ dɔɔb epata kɔ elo bin. Zɛɛb é tyaasɛs yisɔ.

⁶ Bis nabe é ààsaa náá, bot dje bis duu, ye nakoozodi biyɔ nɛghu bɛdhiiti bot.

⁷ Tin, dāa ye di náá, bis é bot ε lwoma ε Klisto ε, bis nabe é nɛ ghwyil ɛnɛɛg bin si metiŋ mes. E di'enek, é sok bot nadika é, bis nadi é nɛ mɛsila nɛ nen dāa moma di ekwyɛɛg bɔn bɛ ε.

⁸ Deenek, bis nabe é, bis moo nɛ kwyɛl nɛ nen dhaa tyɛ. Kwyɛl tak naasa náá, bis nāzosik kɔ ɛdɛ bin Mbɛɛ Bhaadal Zɛɛb. Tin, ye nabe é bis naakwyɛl ɛdɛ bin, dɔɔ nɛ tsik'es. Ye nabe é, bi moo nɛ boo metan é mis mes.

⁹ Bɔn nyɛɛg bi ɛpetaala nɛ mezuk mes nɛ etuŋ bis. Tin, bis nadi é tɔ mɛsa mwos nɛ pum ekaab náá, bis ɛzekɛdi nɛ nen boo ɛbɛp, ye ε deenek ε bis di egoola bin Mbɛɛ Bhaadal Zɛɛb.

¹⁰ Biyɔ é di bɛtyaasɛs bis, dɔɔ nɛ Zɛɛb pe é tyaasɛs yis náá, bis nabe é bis naakɛ tɔ epiki, tɔ edɛɛ, ààlyoaa dɛjin é mis mɛ biyɔ bot ε zeedum kɔŋ nɛ Zɛɛb ɔ. Tin, ye tok nɛ mot aazyɛ zɛmwana nɛ nen dum nɛ mɛfulu mes.

¹¹ Bi nɛ baagu náá, bis nadi nɛ nen ε dāa sɛɛg bɔn di ɛtɛp bɔn bɛ ε.

¹² Tin, bis nabe é, bis naadjɛ bin mɛghaaz nɛ mɛlyo. Bis naawaab nɛ nen nɛ ghwyil djas náá, bi kɛ tɔ epiki dāa Zɛɛb di ekwyɛl ε. Nyɛy mot di ekwyɛl náá, bi ni tɔ ɛyɔŋ ε lɛ, ɛtɛp bi neebela di tɔ duma ye ɔ.

¹³ Bis ɛpebulal bhɔɔ nɛ Zɛɛb etɛɛ náá, é ghɛŋ bis nagoola bin mbɛɛ Bhaadal ε, bi naagwak yɛ. Tin, bi naamyaa yɛ dāa mɛkpa mɛ Zɛɛb, ààbɛ dāa mɛkpa mɛ bot ε bɔs. Deenek, nɛ tɛɛtɛ yɛ é mɛkpa mɛ Zɛɛb, ye é di esa mɛsa tɔ len, biyɔ bot ε zedum kɔŋ nɛ Zɛɛb ɔ.

¹⁴ Bɔn nyɛɛg bam, bi eebaŋa ezɛɛga mendjaala Zɛɛb di pɛ kyee dik Yude ɛ, bot ɛ di tɔ ɛgwakel nɛ Yezu Klisto ɔ. Bi naazuk ɛtɛp bot ɛ kyee dik'en, ye ɛ dhatyee bot ɛ ezɛɛga mendjaala menek zezuk ɛtɛp bot ɛ mbyak eYuda ɛ.

¹⁵ Bɛ naagɔ Ghɛŋ Yezu nɛ bɛngooel-mɛkpa Zɛɛb, bɔɔ ɛ di ewa mena tɔ tsik mezuk. Deenek, Zɛɛb ààmyaala nɛ nɔɔ, bɛ moo ɛ bot ɛ bhyen ɛ bot ɛ bɔs djas.

¹⁶ Deenek, bɛ ɛpekwyɛl ɛlu bis náá, bis nàgoola bot ɛ di ààbɛ bot ɛ mbyak eYuda ɔ, Mbɛɛ Bhaadal di nɛ ghwyil ɛtsik bɛ ɔ. E di'enek, bɛ ɛ kuku ɛbil ɛ mesyem kɔ mesyem mɔɔ bɛ di ezezye nɛ ɛsesa sok ɛ. Tin, ɛbuk ɛ Zɛɛb moo ɛ kɔ lɔɔ.

Ekwosak ɛ Pɔl ɛ náá, nyɛ baasik pɛ kyee dik Tesalonik

¹⁷ Bɔn nyɛɛg, ye kabɛ bisɔ ɔ, bis bɛka nɛ nen ɛ edi ba mɔn ɛwala batsa, mena bɛkaka ɛ edi, tin, menaka ɛ edi wat tɔ sisim. Bis ɛ nɛ boo ɛkwosak náá, mena baabomaka, dum nɛ tɛp tak ɛ bis di esa mɛghaaz ɛtɛp ɛkum pɛ yibɔ.

¹⁸ Bis ɛpekwyɛl náá, bis baazyɛ pɛ yibɔ. Deenek, mam Pɔl, esok nɛ esok mɛ nadi ɛ nɛ gwyɛs ɛzyɛ penek, tin, Satan nadi ɛlu bis.

¹⁹ Deenek, ye tok bɛdhiiti bot, ye ɛ biyɔ ɛ di ɛbwaalel ɛ les nɛ mɛmyaala mes, bi ɛ kɔtɔ duu yes ee bis aadiig bet ɛ mis mɛ Ghɛŋ Yezu ɛ sok nyɛ aabula ɛ.

²⁰ Deenek, nɛ tsɛɛtsɛ biyɔ ɛ di edjɛ bis duma nɛ mɛmyaala!

3

¹ Tin, dáa ye nadi náá, bis nabɛ ɛ ààkabɛ nɛ

ghwyil εμαad ε, bis naabee náá, ye goka é bis lik biso bemet kɔ ghaada Aten.

² Deenek, ye be é bis eekyeed mɔn nyεεg'es Timote mot bis ne be nɔɔ di egyee tɔ mesa me εgoola Mbεε Bhaadal ε Klisto ɔ. Nyey é di egoka ε ne εdje bin ghwyil ne mεghaaz étεp εdum ε koη ε len ne Zεεb.

³ Deenek, mot ngɔt tɔ len needi àákwyit tɔ mεtiiga me be di etiig bis ε. Bi ne gu biyɔ bemet náá, etεp djas ee bis di ebee wak ε, ye é Zεεb nye εmet ε nadi ekwyel náá, bis boma ne ye.

⁴ Eghεη bis nadi pe yebɔ ε, ye nabε é bis naalεε bin náá, bis é waatiigaa. Ye é sa bis di boma ne ye ε, bi ne gu ye εnyɔεpe.

⁵ Dáa me nadi àákabε ne ghwyil εμαad ε, ye é étεp tak ε me nalwom Timote, nye neezεbaηa bis menduk me εdum ε koη ε len ne Zεεb. Me nadi é ne bwɔɔ náá, Satan εzεkewa bin tɔ mεbhɔwal, é di'enek, pe mesa me bis nasa kɔ εsu ε len naagwyε kɔ toto.

⁶ Dáa ye di náá, Timote eezεbula pe daa les ε, nye eεbaηa bis tεtε Bhaadal dum ne kwyl dɔɔ ne εdum ε koη ε len ne Zεεb. Nye eelεε bis náá, bi ne taala bis εbuεpe, εkwosak ε len ε náá, mena baabomaka dáa biso pe baadi ekwos ε.

⁷ E di'enek bɔn nyεεg, tɔ etuη ne mezuk mes djas, εdum ε koη ε len ne Zεεb naadjε bis mεghaaz.

⁸ Nenak, bis ε tɔ mεmyaala ne tsik etεε náá, bi é ghin tɔ εgwakel ne Ghεη.

⁹ «Ha!» Bis aadi àábulal bhɔɔ ne Zεεb dhaa nyel tin dáa, dhi biso ebee mbi mεmyaala me bi di εdje bis é mis me Zεεb ε?

¹⁰ Mwos ne pum bis ne wa zii é εdjaala Zεεb étεp

mena neebaabomaka. Etεε náá, bis neebaadjε bin sa bi di ààβε ne ye tɔ edum ε kon ε len ne Zεεb ε.

¹¹ Beta náá, Zεεb Σεεg'ena nyey emet ne Gheη'enaka Yezu djε bis ze me εzyε pe yibɔ!

¹² Beta náá, Gheη sa náá, kwyel bi di ne ye pak'en, ne kwyel bi di ekwyel bot djas ε gheetetɔ sok. Tin, kwyel tak goka ne edi é dáa kwyel bis di ekwyel bin ε.

¹³ Beta náá, Gheη djε bin meghaaz étεp bi needi bot ε na dεε ààβε ne ndjε é mis me Zεεb Σεεg'enaka, ne é sok Gheη'enaka Yezu aazyε ne bot be djas ε. Amen!

4

Mεfulu me Zεεb di emyaala ne ye ε

¹ Bɔn nyεεg, bis naazelyaal bin dáa bi di egoka ne εke ε étεp Zεεb neemyaala ne nen ε. Tseetse, bi ne sa ye. Nenak, bis epedjaala ne nen ne din ε Gheη Yezu, baasaka kedhaa ee bi nadi esesa sok ε.

² Tin, bi ne gu melyo me bis zedjε bin dum ne Gheη Yezu ε enyɔpe.

³ Gwakeka ekwosak ε Zεεb: Bi goka é ne edi bot ε na dεε, sa bi ààdi tɔ membyam.

⁴ Deenek, mot ne mot gu ebaal ε nyel'ε tɔ é dεε ne duu djas.

⁵ Sa wɔ ààbet náá, embee mekwosak dhaa wɔ ghwyil, dáa bot ε di ààdi bot ε mbyak eYuda ɔ, bot ε di ààgu Zεεb ɔ.

⁶ Tin, tɔ etεp bak, sa mot ààsa mɔn nyεεg ebiyo, neghu ekɔɔ nyε. Ye nabe é bis eeleε bin, bis naadul bin melɔ náá, Gheη ε waawa bot ε di esa membi etεp binek ɔ é feη.

⁷ Tin, Zɛɛb nabɛ é ààdjóo mena étɛp mena needika tɔ mɛzɔ. Ye nabɛ é étɛp mena needika tɔ é dɛɛ.

⁸ Ye é étɛp tak ɛ, di náá, mot di ebyen mɛlyo mak ɔ, nyɛ àabyen mot. Tin, nyɛ byen é Zɛɛb mot di edjɛ bin Sisim na Dɛɛ ɔ.

⁹ E di'enek, bi tok nɛ gwyɛs náá, bɛ kwyɛl bin mɛkana kɔ ɛsu ɛ kwyɛl pak'en. Etɛɛ náá, Zɛɛb naalyaal bin dáa bi di egoka nɛ ɛkwyɛla pak'en ɛ.

¹⁰ Kwyɛl tak ɛ, bi di etel nɛ bɔn nyɛɛg bin djas di tɔ Masedwan ɔ. Tin, bɔn nyɛɛg bis, bis ɛpedjɛ bin mɛghaaz étɛp bi neebaasa dhaa ee bi nadi esesa sok ɛ.

¹¹ Tin, saaka náá, bi di tɔ egwyem, waka lyem tɔ etɛp bin ɛmet, saka mɛsa nɛ nɛ mɛmbɔ men ɛmet, dáa bis naloolyo bin ɛ.

¹² E di'enek, mɛfulu men é mis mɛ bot di ààdum kon nɛ Zɛɛb ɔ, yɛ waasa náá, bɛ djɛ bin duu. Tin, bi aanàdi ɛbɛp étɛp dhiiti mot.

Ɛbula ɛ Ghɛɲ

¹³ Bɔn nyɛɛg, ɛkwosak ɛ les é náá, bi gu etsɛɛtsɛ kɔ ɛsu ɛ bot ɛ nazegwyɛ ɔ, etɛɛ náá, bi needi ààdi nɛ mɛnwyaad tɔ lyem dáa bɛdhiiti bot, bot ɛ di ààdi nɛ ɛbwaalel ɔ.

¹⁴ Bis nɛ ɛmyaal náá Yezu naagwyɛ gom bhis ɛsyee. Tin, bis nabaamyaal náá, kɔ lo ɛ Yezu, Zɛɛb ɛ waagomal bot djas nagwyɛ bɔɔ edum kon nɛ Yezu ɔ.

¹⁵ Beeka sa bis di elyo bin dum nɛ mɛkpa ɛ Ghɛɲ ɛ. Ye tok náá, bot aalik nɛ tsik kɔ bɔs é ghɛɲ Ghɛɲ aazyɛ ɔ aapaaleebyet tɔ tɔ gwoo, ɛsok nɛ bot ɛ nazegwyɛ ɔ.

¹⁶ E di'enek, bot waagwak boo tsim ekomande, gwood boo kukuma efofop, zɛnɔɔ bham tɔŋ ɛ Zɛɛb. Tin, Ghɛŋ nyɛ ɛmet aasul tɔ gwoo. Deenek, bot ɛ nazegwyɛ bɔɔ edum ɛ koŋ nɛ Klisto ɔ, bɔɔ ɛ aapaadi bot ɛ mɛkɛn ɛ ɛgom.

¹⁷ Bhii tak, bot aadi nɛ tsik kɔ bɔs dwoo lɛɛg ɔ, bɛ waabyet sama nɛ bot ɛ nazegom bhis ɛsyee ɔ tɔ tɔ gwoo, tɔ eguud pɛ ɛko ɛtɛp ɛkɛboma nɛ Ghɛŋ. E di'enek, mena aakadika ɛ kɔm-kɔm sama nɛ Ghɛŋ.

¹⁸ Djɛlka mɛghaaz pak'en nɛ mɛkpa mak.

5

E bhwood ɛlu ɛ Ghɛŋ

¹ Bɔn nyɛɛg, bi tok nɛ gwyɛs nɔ́á, bɛ kwyal mɛkana kɔ ɛsu ɛtɛp bak ɛtɛp bi neegu ɛwala nɛ dwoo ɛtɛp bak djas aasaɛ ɛ.

² Etɛɛ nɔ́á, biyɔ bɛmet nɛ gu ɛnyɔɛpe nɔ́á, dwoo Ghɛŋ aabula ɛ, yɛ aadi ɛ zaka. Tin, nyɛ aazyɛ ɛ ɛ pum dɔ́a mot djii.

³ Eghɛŋ bot aakeke nɔ́á: «Bis ɛ ɛnyɔɛpe, bis ɛ tɔ egwyem ɛ» E di'enek ɛ, mezuk aatuula kɔ lɔɔ zaka, dɔ́a moma di egwak ɛbɛl ɛ. Tin, mot ngɔt aanɔ́kwaadi kiid e mezuk menek.

⁴ Deenek, biyɔ bɔn nyɛɛg, bi tok tɔ ghooghom etɛɛ nɔ́á, dwoo tak neetuula bin zaka dɔ́a mot djii di etuula tɔ ndjaŋ ɛ.

⁵ Nɛ tsɛtsɛ biyɔ djas ɛ bot ɛ gwyɛ, bot ɛ mwos. Tin, mena tokeka bot ɛ pum, ààbɛ bot ɛ ghooghom.

⁶ Tin, sa mena ààdjaakasi dɔ́a bɛdhiiti bot, mena goka ɛ nɛ ɛdi ɛ ndjem, nɛ ɛdi ɛ bot ɛ di edil elyem ɔ.

⁷ Bot ɛ di edja gɔ ɔ, bɛ dyeebadja gɔ ɛ ɛ pum. Bot di edɛ mɛnyok ɔ, bɛ dyeebadi nɛ elangi tak ɛ ɛ pum.

⁸ Ye kabε menabelka bot ε mwos ɔ, mena gokaka ε ne edi bot ε edil ε lyem. Djhoonɔka edum ε kon ne Zεeb, ne kwyeɔl dɔa ghun, da εbwaaleɔl ε tsik edi dɔa kɔtɔ dεeb ε.

⁹ Deenek, Zεeb nabe ε àadjoo mena etεp nye neepεε mena, tin, ye nabe ε etεp mena needika ne tsik ne din ε Gheɲ'enaka Yezu Klisto.

¹⁰ Klisto nagwye ε kɔ esu elena, etεp mena needika ne tsik sama ne ne ye nakoozodi nɔa, menaka ε ndjem, neghu menaka ε ε gɔ.

¹¹ Djεelka meghaaz ne lyoel pak'en tɔ edum ε kon ne Zεeb dɔa bi di boozeyε ne esesa sok ε.

Melyo me mesik ne meswosel

¹² Bɔn nyεεg, bis waab ne nen nɔa, bi duwal bot ε di esa mesa pak'en ɔ, bot ε Gheɲ nalwom be nɔa, be djεed bin ne edul ε bin melɔ ɔ.

¹³ Tin, lyaalka be nɔa, bi ne looba ne nɔɔ, bi ε ne kwyeɔl ne nɔɔ dhaa tyε etεp mesa me be di esa ε. Dika tɔ egwyem pak'en.

¹⁴ Bɔn nyεεg, bis εpedje bin meghaaz nɔa: Dulka elεte bot melɔ, djεka bot ε di ne bwɔɔ ɔ, meghaaz, kwyeeka βetsakbel ε bot, dika ne εmaad ε lyem ne bot djas.

¹⁵ Bi εkobaka, sa mot àabulal εbiyo ne εbiyo. Tin, gheesaaka enem esa pak'en dɔɔ ne bot djas.

¹⁶ Dika melu djas tɔ memyaala.

¹⁷ Djaalaka ngwyis,

¹⁸ bulalka bhɔɔ ne Zεeb ε etεp djas, yenek ε εkwosak ε Zεeb dum ne biyɔ bot ε di tɔ εgwakel ne Yezu Klisto ɔ.

¹⁹ Sa bi àalu Sisim na Dεε nɔa, nye sa mesa me.

²⁰ Sa bi ààdyamal mɛkpa mɛ bɛngooolel ɛ mɛkpa ɛ Zɛɛb.

²¹ Tin, sɔska etɛp djas, da bi ɛbaal sa di nyɔ ɛ.

²² Tsetaka nɛ membi mɛ esa djas di ebiyo ɛ.

²³ Beta náá, Zɛɛb nyɛy ɛmet mot di ɛsuk egwyem ɔ, sa náá, bi di tɔ edɛɛ nyel djas. Deenek, nyɛ baal esisim ben, Sisim Zɛɛb di tɔ len ɛ, dɔɔ nɛ mɛnyel men, étɛp bi needi ààbɛ nɛ ndjɛ dwoo Ghɛɲ'enaka Yezu Klisto aabula ɛ.

²⁴ Mot nadjoo bin ɔ, nyɛ aasa náá etɛp binek djas sael etɛɛ náá, nyɛ é sosoob.

²⁵ Bɔn nyɛɛg, djaalaka pe étɛp'es.

²⁶ Bɔn nyɛɛg, swoska bɔn nyɛɛg bin nɛ mɛbeedela dáa bɛ tɛtɛ bɔn nyɛɛg.

²⁷ Deenek, mɛ ɛpedjaala nɛ nen nɛ din ɛ Ghɛɲ náá, bi laa mɛkana mak é mis mɛ bɔn nyɛɛg bin djas tɔ edum ɛ konj nɛ Zɛɛb.

²⁸ Betka náá, enɛm nɛ embɛɛ e Ghɛɲ'enaka Yezu Klisto di nɛ nen.

Bekwel

Bekwel: Bekwel (New Testament)

copyright © 2024 Wycliffe Bible Translators, Inc.

Language: Bekwel

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 26 Apr 2025 from source files dated 26 Apr 2025

93bbbee1-b255-555f-8c39-01878a3cad57